

慎柔五書卷之四

石 震瑞章父訂正

顧元交勇尹父編次

瘦樵程永培校

癆瘵第四

脈法

勞瘵脈酉戌時洪盛寅卯時細弱者陽氣虛陷也
忌服苦寒損其陽氣當以助陽之劑復其寅卯
之位微加瀉陰火而已 若服寒涼證雖大減

脈反加數者陽鬱也

右脈大用保元湯左脈大用六味湯不減若燥者以瓜蒌生甘草散潤之

久病咳嗽氣喘若脈洪數不可卽用補藥如服之虛火一退多令人痿倦不起須先用獨參湯以接其氣數日後數脈漸退方與調理爲是

總論

夫癆者勞也非一端可盡或苦心竭其心脾之神

志或酒色竭其肝腎之陰精或久痢久瘧傷寒
傷暑諸症治之不當損其氣血傷其脾胃五藏
乾枯而火起以致發熱則金受尅大腸先結燥
而水之源先涸矣宜見脈見症用藥果當無不
愈者若初熱未甚繼以治法之非久之卽成蒸
病蒸病者如甑之蒸熱之極也然使初病元氣
尚強脈氣尚旺照古方用五蒸湯加減二十三
蒸之法亦無不驗治蒸法服之病稍退又當察

症清心參用癆病治方不可造次蒸病或十日
半月熱極致骨中血凝便化爲蟲張仲景立祛
血之法不使凝血化蟲麤蟲丸百勞丸是也倘
治之不得其序不能祛血血化爲蟲是時病人
脈氣尚充精神尚旺猶可掇也如聲啞喉痛寒
熱大作脈細而數不思飲食精神視聽俱不能
支皆屬不治又有火鬱痰凝氣滯咳嗽發熱氣
喘葛先生保和湯保真湯次序用之火散痰開

熱退總歸八珍湯調理又有吐紅咳嗽脈雖數
有神不至于蒸極作蟲者脈洪脈數虛虛實實
通變在乎心靈矣

骨蒸由氣虛不能化血血乾則火自沸騰肉如針
刺骨熱煩疼或五心俱熱或兩肋如火或子午
相應或晝微惡寒而夜反大熱雖腎經所主傳
變不常蒸上則喘咳痰血舌黑耳鳴目眩等症
蒸下則見夢遺淋濁泄瀉腰疼脚疼等症蒸中

慎齋五書 卷之四 五
則見腹脹脇痛四肢倦怠等症

不問陰病陽病日久皆能傳變男子自腎傳心肺
肝脾女子自心傳肺肝脾腎五藏復傳六府而
死矣有始終只傳一經者有專着心腎而不傳
者大要以脈爲證驗

凡氣血勞倦不運則凝滯踈漏邪氣得以相乘又
飲食勞倦所傷則上焦不行下脘不通熱極蒸
胸中而內熱生矣凡頸上有核腸中有塊或當

磨冰冷或無力言動皆痰涎結聚氣血凝滯之所致故以開關啓胃爲先蓋關脉閉則氣血乾竭胃氣弱則藥無由行但陽虛不可偏用辛香丁附之類陰虛不可用苦寒古方有開關定胃散今亦難用竊其意推之

蟲爲氣血凝滯瘀血化成但平補氣血爲主加以烏梅青蒿硃砂之類而蟲自亡矣紫河車丹紫河車丸青蒿膏蚘蛤散

選用惟度其

虛實爲主

凡體虛者宜先用補法扶其元氣然後用王道之藥佐之以殺蟲之劑如化蟲丸史君子丸之類或追蟲後而繼以溫補亦可不然則蟲去而元氣亦散

傳屍之說不必深泥歷觀癆瘵皆因酒色之類損傷心血以致虛火妄動醫者不分陰陽用藥病者不思疾由自取往往歸咎前因甚者疑及房

室器皿墳墓及免業飛尸遞相傳疰古人云癆
瘵三十六種惟陰德可以斷之不幸患此疾者
或入山林或居靜室清心戒慾專意保養庶乎
病可除根不然卽服藥不效

癆蟲須分五藏常居肺間正所謂膏之上育之下
針之不得藥之不行只宜早灸膏育四花爲佳
若蝕肺系則咯血吐痰聲嘶思食無厭病患至
此未易療治當參究古法九蟲及一十八種蟲

慎齋五書 卷之四
名之異并紫庭取蟲諸法

晝熱行陽二十五度大抵柴胡飲子夜熱行陰二
十五度四順飲子平旦發熱熱在行陽之分肺
氣主之故用白虎湯以瀉氣中之火日晡潮熱
熱在行陰之分腎氣主之故用地骨皮散以瀉
血中之火

肝症發熱肉下骨上寅卯尤甚瀉青丸人中白散
心症發熱在血脈日中則甚單瀉心湯導赤散

硃砂安神丸脾症發熱在肌肉遇夜尤甚瀉黃
散三白湯肺症發熱在皮毛日西則甚瀉白散
甚者涼膈散腎症發熱在骨亥子尤甚兩手足
心如火滋腎丸

尸注一症予嘗治之先癸亥夜二更六神皆聚之
時灸腰眼穴七壯然後用藥倘不能待先用藥
亦可注病亦似勞症但兩足無力行則痿疲是
也其治法六脈洪數八物湯脾肺不足補中益

氣湯睡不穩歸脾湯不思食六君子湯隨症推
類但煎劑中須加忍冬葉三錢同煎本草以其
葉能治尸注也

凡治勞症或男或婦若淫火不退者雖治不治

骨蒸勞

夫骨蒸勞者由於積熱附于骨而名也亦曰傳尸
殞殍復連無辜其名不一此病皆由脾胃虧損
所致其形羸瘦泄痢肢體無力傳于腎則盜汗

不止腰膝痛夢鬼交侵小便赤黃傳于心則心神怯悸喜怒不時頰唇赤色乍熱乍寒傳于肺則胸滿短氣咳嗽吐痰皮膚甲錯傳于肝則兩目昏暗脇下妨痛閉戶忿怒五藏既病則難治療立齋云前症多因經行胎產或飲食七情而傷脾胃之所致又或病後失於調攝而成也

東垣云發熱之症肺熱者輕手乃得微按全無曰西尤甚其證咳嗽寒熱輕者用瀉白散重者涼

痛散白虎湯地骨皮散心熱者微按之皮膚之
下肌肉之上在血脈也日中大甚其症心煩心
痛掌中熱而噦用黃連瀉心湯導赤散硃砂安
神丸脾熱者輕手捫之不熱重手按至筋骨又
不熱不輕不重在輕重之間在肌肉也遇夜尤
甚其症怠惰嗜臥四肢不收無氣以動用瀉黃
散肝熱者按之肌肉之下至骨之上寅卯時爲
甚其症四肢滿悶便難轉筋多怒多驚筋痿不

能起于床用瀉青柴胡湯飲腎熱者按至骨分
其熱蒸手其症骨酥如蟲蝕困熱不能起于床
用滋陰丸此治實熱之法也

薛立齋云肺經虛熱者用人參補肺湯脾虛不能
生肺者用六君子湯脾熱移于肺者用三黃丸
心經虛熱者用補心湯命門火衰不能生土者
用八味丸肝虛不能生心者用補肝散腎尅心
者用附子理中湯脾經虛熱者用人參黃芪散

土尅水者用承氣湯腎虛不能培肝者俱用六味丸

血風勞

血風勞症因氣血素虛或產後勞傷外邪所乘或內有宿冷以致腹中疼痛四肢酸倦發熱自汗及婦人月水不調面黃肌瘦當調肝脾氣血為主

東垣云喜怒不節起居不時有所勞傷皆損其氣

氣衰則火旺火旺則乘其脾土脾主四肢故因
熱懶言動作喘乏表熱自汗心煩不安當病之
時宜安靜存養以甘寒瀉其熱氣以酸味收其
散氣以甘溫補其中氣經言勞者溫之損者溫
之要略云平人脈大爲勞以黃芪建中湯治之

冷勞

冷勞者氣血不足藏府虛寒以致臍下冷痛手足
時寒婦人月水失常飲食不消或時嘔吐惡寒

性要五書 卷之四
發熱骨節酸疼肌膚羸瘦面色痿黃也

立齋曰前證有內外真寒有內外真熱亦有內真熱而外假寒有內真寒而外假熱若飲食難化大便不實腸鳴腰痛飲食畏寒手足逆冷面黃嘔吐惡見風寒此內外真寒之症也宜用附子理中湯以回陽八味地黃丸以壯火若飲食如常大便堅實胸腹痞脹飲食喜冷手足煩熱面赤嘔吐不畏風寒此內外真熱之症也宜用黃

連解毒湯以滋陰六味丸以壯水若飲食如常
大便堅實胸腹痞脹而飲食喜寒手足逆冷而
黃嘔吐畏見風寒此內真熱而外假寒也亦用
解毒湯六味丸而宜於熱服若飲食少思大便
不實吞酸噯氣而手足煩熱面赤嘔吐不畏風
寒此內真寒而外虛熱也亦用附子理中及八
味丸而不妨溫飲經曰益火之源以消陰翳壯
水之主以制陽光使不知真水火之不足泛以

寒熱藥投之則舊病不去新病復生矣火之源
者陽氣之根卽心是也水之主者陰氣之根卽
腎是也非謂火爲心原爲肝水爲腎主爲肺也
或者亦以命門爲火原未爲非是故用八味丸
以益命門耳

熱勞

熱勞由心肺壅熱傷于氣血以致心神煩躁頰赤
頭疼眼澁唇乾口舌生瘡神思困倦四肢壯熱

飲食無味肢體酸痛怔忡盜汗肌膚作疼或寒熱往來當審其所因調補氣血其症自減

立齋云前症乃壯火食氣煎熬真陰所致也王太僕云如大寒而甚熱之不熱是無火也當治其心大熱而甚寒之不寒是無水也當助其腎心盛則生熱腎盛則生寒然心虛則熱收于內腎虛則虛寒動于中竊謂前症若肝脾血虛四物參朮肝脾鬱熱小柴胡合四物脾胃氣虛補中

益氣湯肝經血虛加味逍遙散肝經風熱小柴
胡湯心經血虛加味四物湯午前熱屬氣分清
心蓮子飲午後熱屬血分四物參朮丹皮熱從
左邊起肝火也實則四物龍胆山梔虛則四物
參朮黃芪熱從臍下起陰火也四物參朮酒拌
炒黑黃柏知母五味麥冬肉桂如不應急用加
減八味丸不時面熱或無定處或從脚心起此
無根虛火也用加減八味丸及十全大補加麥

冬五味子主之已上多出自立齋婦人良方帙
中但男女五藏相同間有少異其爲勞則一也
癆瘵各症論

夫骨蒸殭殍半臥半起之謂復連內傳五藏之謂
尸注勞注蟲注熱注冷注食注鬼注症者注也
自上注下與前人相似故曰注其變有二十二
種或三十六種或九十八種令人沉沉默默寒
熱盜汗夢與鬼交遺泄白濁或腹中有塊或腦

後兩邊有結核咳嗽膿血下痢羸瘦死而傳注
甚至滅門更有飛尸遁尸寒尸喪尸尸疰謂之
五尸人爲其疰者不自知所苦雖有狸骨獺肝
天靈蓋等方未嘗效也唯崔氏灸法早用有濟
若寒熱自汗面白目乾口苦神昏善恐不能獨臥
傳在肝也若寒熱面黑鼻燥善忘大便秘瀉口
舌生瘡傳在心也若寒熱面青唇黃舌本硬強
言語不出飲食無味羸瘦吐涎傳在脾也若寒

熱面赤鼻白乾燥毛折咯嗽喘急吐涎膿血傳
在肺也若寒熱面黃耳焦脚脢酸痛小便白濁
遺瀝腹痛傳在腎也已上陳臨川先生未有治
法

立齋云前症誠然有之故葛仙翁用獺肝一具陰
乾杵末水下方寸匕日三服未愈再服宋宣和
間一法師善考訊鬼怪時一婦以疾投狀旣而
如有鬼祟所附曰非我爲患乃病人命自衰耳

渠今已成蟲食肺故令吐血聲嘶又屢訊彼所
畏何物云以獺爪爲末酒服之則去矣患家如
其言則愈獺爪卽獺肝之類與元珠云蟲瘵多
有互相傳染甚至絕戶此乃冤業相纏及風水
所致雖有符文法水下蟲之方蟲去而人亦亡
但能平素保養或可希免救生微旨云益氣補
肺益精補腎皆資其化源也蓋人之精血常不
足加之數奪其精資化失常則胃氣不固精氣

滑脫不能上接陽氣故頭重或氣弱食少元氣
下陷脈微外散欲絕而虛洪或見損脈總屬元
氣不足非有外感賊邪之證也

立齋嘗治一婦素勤苦因喪子

肺病

飲食少思

脾

病忽吐血甚多

心病

而自止此後每勞則吐數

口瘵症已具形體甚倦午前以補中益氣湯滋
其脾肺午後以歸脾湯養其心脾送地黃丸滋
腎而愈

又一女子患前症反其唇視有白點此蟲蝕肺也
余曰急尋獺肝治之不相信果咯膿而歿後聞
其兄弟三人皆夭於此症大凡久嗽當視其兩
唇若上唇有點蟲蝕上部下唇有點蟲蝕下部

尸厥

夫飛尸者游走皮膚穿行藏府每發刺痛變作無
常遁尸者附骨入肉攻通血脈見屍喪聞哀
哭便發風尸者淫濯四肢痛而昏沉遇風雪

便發 沉尸者纏骨結藏內腫心脇發則絞痛
遇寒冷便發 注尸者舉身沉重精神錯雜時
覺昏憤每至節氣便發已上並宜蘇合香丸治
之

按丹溪云凡人手足逆冷膚粟頭面青黑精神恍
惚或錯言妄語或牙關緊急或昏寐倒仆弔死
問喪入廟登墓多有此病先以蘇合香丸灌之
次服調氣平胃散玉機微義云卒厥飛尸客忤

鬼擊口噤用麻黃湯寒厥表熱裏寒則下利清
穀食下則吐脈沉手足冷用四逆湯熱厥腹滿
身重難轉面垢譫語遺溺手足冷自汗脈沉滑
用白虎湯若人身忽然不動自閉口噤惡聞聲
響眩冒頃時方寤此由出汗過多氣并於血陽
獨上而不下氣壅塞而不行耳氣過血還陰陽
復通移時方寤名曰鬱冒亦名血厥宜白薇湯

倉公散

人病尸厥呼之不應者死脉當大反小者死

錦衣楊永興舉家避雋有僕沉醉失避者旣而神思昏昧徧身青傷煎金銀藤湯灌之卽愈

一婦人忽昏憤發謔語兩脚踝膝臀處皆青腫痛不可忍口稱苦楚次日方甦痛尚不止用金銀藤兩許水煎服愈

一婦人入古塚患前症以紫金錠灌之卽愈

勞病主治湯方門

恒系五言
卷之四
人參養榮湯

治男子血虛有汗潮熱

人參

白朮

茯苓

甘草

川歸

黃芪

肉桂

陳皮

遠志

熟地

五味子

薑水煎

補中益氣湯

治氣虛有汗潮熱

見虛損門

茯苓補心湯

治血虛無汗潮熱

人參

茯苓

陳皮

桔梗

枳殼

前胡

川芎

地黃

川歸

白芍

甘草

半夏

紫蘇

乾葛

薑棗水煎

人參清肌散

治氣虛無汗潮熱

人參

白朮

茯苓

赤芍

當歸

柴胡

葛根

甘草

半夏麴

薑棗水煎

八物湯 治女子血虛有汗潮熱

見虛損門

人參柴胡散 治氣虛無汗潮熱

白朮

葛根

半夏

柴胡

白茯苓

人參

赤芍

當歸

甘草

薑棗水煎

逍遙散 治氣血兩虛無汗潮熱

白朮

茯苓

甘草

白芍

歸身

柴胡

薑棗煎

人參五味子散 治咳嗽咯血

人參

五味子

桑白皮

白朮

黃芪

白茯苓

地骨皮

熟地

柴胡

歸身

前胡

陳皮

甘草

枳殼

桔梗

渴加烏梅半個
熱加青蒿知母

葛氏保和湯

治吐血後咳嗽

知母

貝母

天冬

麥冬

天冬花

天花粉

苡仁

杏仁

五味子

甘草

兜鈴

紫苑

百合

桔梗

阿膠

當歸

生地

紫蘇

薄荷

薑煎入飴糖一匙日三服

血盛加蒲黃茜

根藕節大薊小薊茅花

痰加南星半夏橘

紅茯苓枳殼枳實瓜蒌仁 喘盛加桑白皮

陳皮大腹皮萊菔子葶藶子蘇子 熱盛加

山梔黃連黃柏連翹 風盛加防風荆芥穗

金沸草甘菊細辛香附 寒盛加入參芍藥

桂枝五味子白蠟

五蒸湯一治骨蒸

人參

黃芩

知母

地黃

葛根

煨石膏

梗米

麥冬

甘草

淨小麥一撮水煎

二十四種蒸病用藥法

己下方法俱從五蒸湯見症加減

所謂勞蒸者毛折髮焦肌膚甲錯其蒸在皮又症

舌白唾血加石膏桑白皮

外熱內寒身振肉瞤其蒸在肉又症食無味而嘔

煩躁不安加芍藥

髮焦鼻衄或復尿血其蒸在血加生地當歸童子

小便

身熱煩躁痛如針到其蒸在脈又症唾白浪語脈
絡亂緩急不調加生地當歸童便

爪甲焦枯眼黑脇痛其蒸在髓又症髓沸骨中熱
加天門冬當歸生地

頭眩熱悶涎濁眵淚其蒸在腦加生地防風

男子失精女子白淫其蒸在玉房加知母黃柏當

歸芍藥

乍寒乍熱中脘煩悶其蒸在三焦加竹葉石膏

小便赤黃凝濁如膠其蒸在膀胱又症右耳焦加
澤瀉滑石

大便秘泄腹中雷鳴其蒸在小腸又症下唇焦加
赤茯苓木通生地

大腹陰痛口舌乾疼其蒸在大腸又症右鼻孔乾
痛加大黃芒硝

口鼻乾燥腹脹自汗睡臥不安其蒸在胃又症舌

下痛加石膏粳米大黃芒硝乾葛

口苦耳聾兩脇下痛其蒸在膽又症眼色白加柴

胡瓜萸

裏急後重肛門閉澁其蒸在廣腸加

缺

小腹疝痛筋脈縱緩陰器自強其蒸在宗筋加

缺

眩暈下淚躁怒不常其蒸在肝又症眼黑加川芎

當歸前胡

舌黑氣短煩悶灑洒其蒸在心又症舌乾加黃連

生地當歸

唇乾口瘡胸腹脹滿畏寒不食其蒸在脾加芍藥
木瓜苦參

咳嗽喘滿咯痰吐血聲嘶音啞其蒸在肺又症鼻
乾加天冬桔梗紫苑烏梅

耳輪焦枯脚氣酸痛其蒸在腎加生薑石膏知母
寒水石藁本

情想不寧精物時下其蒸在右腎加

缺

心膈噎塞攻擊疼痛俛仰煩寃其蒸在膈加缺

上氣喘促鼻乾身熱不安其蒸在氣加人參黃芩
梔子 以上共二十三種加減係立齋先生引

醫林集

胞蒸小便赤用澤瀉茯苓生地沉香滑石

膀胱蒸右耳焦用澤瀉滑石

骨蒸齒黑腹痛足脛瘦用鼈甲地骨皮丹皮當歸

生地

臀蒸腿細肢腫腑臟俱熱用石膏滑石

膚蒸肌肉熱用牡丹皮

實熱加黃芩黃連黃柏

大黃

虛熱加烏梅柴胡蛤蚧青蒿鼈甲丹皮

以上出體仁彙編

薛立齋云凡此諸症虛勞熱病皆由食肉與油膩
房勞飲酒而成者久蒸不除變爲疔症卽死亦
有瘡久不愈以致咳嗽失治漸成骨蒸勞瘵當
推標本而治之

按薛立齋云蒸病二十四種止簡得二十三種體
仁彙編言蒸病亦二十三種且蒸病各異各蒸
下註或有或無可見病之險難人罕傳師所以
闕漏無憑前後不一俟博觀者補之

海藏云以上諸蒸或藏病或府病或府藏俱病脈
絡氣血交經相屬用藥皆當合而用之君臣佐
使上下奇偶表裏虛實逆從通塞汗下補吐咸

在其中

凡蒸病不已骨節間陰有乾血用行血丸

大黃廔蟲丸 治一切勞傷內有乾血肌膚甲錯

兩目黯黑緩中補虛

大黃 十分

蒸

黃芩 二兩

甘草 三兩

桃仁 一升

杏仁 一升

芍藥 四兩

乾地黄 十兩

乾漆 一兩

蚘蟲 一升

水蛭 百枚

蟻蠩 一升

廔蟲 半升

煉蜜丸小豆大酒飲服五丸日三服

仲景百勞丸

治一切癆瘵積滯未經藥壞証者

當歸炒

乳香

沒藥一錢

人參

蜚蟲

拾肆個
去翅足

水蛭

拾肆
個炒

桃仁

拾肆粒
去皮尖

大黃

肆錢

蜜丸如桐子大都作一服可百丸五更用百

勞水下取惡物為度服白粥十日百勞水者

杓揚百遍即甘瀾水也

立齋先生止述獺爪治蟲不及言古治蟲之方今

具于此有心者究焉

一肝癆熱生長蟲在肝令人畏恐不安眼中赤壅

治以五鳳丸

烏雞卵

去黃
五枚

吳萸

東行根
三升

黃蠟

三兩

乾漆

四兩

粳米粉

半升

同入鍋內火煉至可丸卽丸如小豆大隔宿

不食清晨米飲下百二十九丸蟲卽爛盡

一心癆熱有蟲長尺餘名蠱蟲貫心卽死治以雷

公丸

雷丸 五枚

陳皮

桃仁 各壹兩
壹錢半

貫衆

蕪荑

青箱子

乾漆 名壹
兩

亂髮 壹團

僵蠶 拾肆枚

為末蜜丸小豆大每二十九丸空心溫酒下

一脾勞熱內有白蟲在脾令人好嘔而胸中咳吐

不出治以茱萸根湯

吳茱萸 東行根
壹錢

火麻子 八錢

陳皮 壹兩
伍錢

水煎服或下蟲或下黃汁凡合此藥禁聲勿

語方驗

一肺癆熱瘦損有蟲在肺令人咳逆氣喘所謂憂
忿氣膈寒熱皆膏肓之疾針灸不到治以五膈

下氣丸

麥冬 五兩

蜀椒 壹兩

遠志

防風

細辛

生薑

甘草 各伍錢

百部

人參

白朮

黃芪

各七錢五分

桂心

貳錢伍分

杏仁

貳拾肆粒

右爲末蜜丸彈子大每服一丸徐徐含化忌

生冷肥膩

一腎癆熱蟻蟲生腎中令人四肢腫急治以千金

散

貫衆

叁兩

乾漆

貳兩

蕪荑

胡粉

愧白皮

各壹兩

吳萸

伍拾粒

杏仁

肆拾伍粒

右爲末平旦井水調服方寸匕漸加病瘥卽

止食

傳屍癘蟲一十八種 傳屍自上注下病與前人

相似故又曰注化精血歸于元陽之內變幻種

類最多古怪

第一代蟲如嬰兒或如鬼或如蝦蟇遇丙丁日食

起醉歸心俞

性系五書 卷之四
二代蟲如亂髮或如守宮或如蜈蚣或如蝦遇

庚辛日食起醉歸肺俞

三代蟲如蚊如蟻或如蠅螂或如刺蝟遇庚辛

日食起醉歸厥陰

四代蟲如亂絲或如猪肝或如蚯蚓如蛇遇戊

己日食起醉歸脾俞

五代蟲如鼈龜或有頭無足或有足無頭或如

鼠或如精血遇甲乙日食起醉歸肝俞

第六代蟲如馬尾有兩條一雌一雄或如鼈有頭
足尾或如爛麩或長或短遇癸亥日食起醉歸
腎俞

古又有九蟲 一曰伏蟲長四寸許爲諸蟲之長

二曰蛔蟲長尺許貫心卽殺人 三曰白蟲
長一寸母子相生其形轉大而長亦能殺人

四曰肉蟲狀如爛杏令人心煩滿悶 五曰肺

蟲其狀如蠶令人咳嗽 六曰蝟蟲狀如蝦蟇

令人嘔吐呃逆喜嘔嘈雜愛食泥炭生米茶鹽
薑椒等物 七曰膈蟲如瓜瓣令人多唾 八
曰赤蟲狀如生肉令人腸鳴 九曰蟯蟲狀如
菜蟲形至細微居廣腸多則爲痔劇則爲癩癰
疽疥癬多蟲之害

大抵諸蟲皆因飲食不節或飢飽失宜或過飧腥
膾炙燔或鼈鳧同食以致中脘氣血不運而成
積積久成熱溼熱薰蒸與瘀血凝結隨五行之

氣變化而爲諸般奇怪之形若腐草爲螢是也
凡蟲症眼眶鼻下青黑面色痿黃脰上有幾條血
絲如蟹爪分明飲食不進肌肉不生沉重寒熱
若不早治相生不已貫心殺人

又有山澗蛇虺水蛭遺精誤飲其水或草木果實
蟲聚誤食以致心腹刺痛或引腰脇時作時止
諸藥不效乃蟲症也雄砂丸主之

鶴虱

蕪荑

乾漆

僵蠶各叁錢

貫衆

石榴皮各伍錢

硃砂

雄黃

雷丸

甘遂各壹錢伍分

右爲末米粉煮糊爲丸麻子大每十丸五更時粥飲下善殺諸蟲或加麝香少許尤妙

又方單雄黃末酒調下亦可

凡取勞蟲依五藏方選用必俟其大醉日方可取之取後隨補各藏如取脾蟲後則補脾取腎蟲

後則補腎若病甚者不分藏府只用追病丹以
斷其根又有輕者用鰻魚煮食或紫河車單陽
虛者金液丹最妙

取蟲法先令病家以皮紙糊一密室不留罅隙擇
一老成人過遞以安息水洒其過遞之人身以
雄黃雌黃塗耳目口鼻上備鐵鉗一把布巾一
幅用香油二觔入鍋微煎令沸仍用高桶一隻
置石灰在內生布巾蓋桶口俟月初蟲頭向上

却服取蟲藥五更初一服五更三點時一服服
後腹中疼痛如刀斧擘總不妨也至巳時必須
下蟲或取臭穢如膠漆或吐瀉膿血塊皆于灰
桶中其蟲或從汗出如紫蠶苗狀或從耳鼻口
中出或小便出怪形不一或青黑或黃紅大者
急用鐵鉗取入油中煎當日將油紙裹入瓦瓶
內石灰填實埋于深山遠僻處以杜傳染其患
人衣被蓆牀盡皆棄之醫者付藥遠避其取下

蟲色白者食藏府脂膏可三十日服藥補之色
黃赤者食血肉可六十日服藥補之色紫黑者
食精髓病傳至腎可謂極矣冀其萬一或爲子
孫除患則可又蟲白頭者亦難治此危氏說也
丹溪云不必深泥

追蟲方

紫河車丸

河車壹具
焙乾

龍胆草

甘草各貳
錢

鱉甲 伍錢

大黃

苦參

黃柏

知母

貝母

敗鼓皮

人中白 各貳錢半

桔梗

胡黃連 貳錢半

犀角

莪朮

芒硝 各錢半

辰砂 壹兩

爲末蜜丸梧子大辰砂末爲衣每服念丸至

三十丸腹熱食前溫酒下膈熱食後溫酒下

傳尸癆瘵俱可下其餘勞怯一月平復

散

大貳指

檳榔伍個

麝香

阿魏

甘遂

安息香各叁錢

硃砂壹錢

右為末每服三錢用薤白葱白各十四莖青蒿二把甘草桃枝柳枝各五寸桑白皮石榴根皮各一片以童便四大碗于磁器內文武火煎至一碗去渣分作三盞調前藥末五更

初服男患女煎女患男煎服藥後如覺欲吐
卽用白梅含之五更盡須下蟲及惡物黃水
黑糞如未下良久又進一服天明更進一服
如瀉不止用龍骨黃連等分爲末白水調下
及白梅粥補之

白薇湯

白薇

當歸

各壹兩

人參

甘草

每服伍錢水煎

倉公散 治卒中鬼擊心腹如刺下血不省及臥
魘齒脚指不覺并諸毒等症

皂莢

藜蘆

雄黃研

礬煨研各等分

每用少許吹入鼻中未嚏再吹以得嚏為度

內鼻散 治尸厥脉動亂而若死

用石菖蒲末內鼻中仍以桂末安于舌上蘇合

香丸亦可

硫黃散 治尸厥不省四肢逆冷腹中如雷鳴或

痰氣不降

焰硝

半兩

硫黃

壹兩

各爲細末每服三分酒調灌之良久再服卽

甦

慎柔五書卷之四終

醫案題辭

夫醫病者無一定之治然不可無一定之學譬
如同一病也有主于扶陽之說者以扶陽之法
治之而其病愈有主于滋陰之說者以滋陰之
法治之而其病亦愈蓋學識既定殊途同歸內
經云醫之治病也一病而治各不同亦此意也
迺淺夫窺其一隅遂欲執此非彼豈窮本達原
之論乎今按慎柔之醫案合之慎柔之學若左

券焉固無所不驗也若欲執慎柔之醫以概天下之醫則予豈敢至欲執天下之醫以非慎柔之醫則此書既付梨棗公之海內傳之千百世其間自有識者定論予不必贅夫慎柔往矣慎柔之書燼矣今復不能終秘而炳諸日星此亦有天也非人也予又何功焉

慎柔五書卷之五

石 震瑞章父訂正

瘦樵程永培校

顧元交勇尹父編次

醫案第五

風例

金壇孝廉蔡長卿令堂年六十餘六脈俱數八至
按之中沉則滑而實惟肝腎二脈洪大而虛經
曰數則爲熱滑則氣有餘而血不足外證則唇

欠目劄手搖身搖面色紅白不時徧身熱火攻
刺自言心中昏悶四肢浮腫硬堅此皆風火搖
動之象陰虛陽亢之症正經所謂熱勝則腫風
勝則動也宜滋陰抑陽用四物湯以養血爲君
加山藥以扶中氣爲臣佐山萸以助陰養肝使
黑柏二分以引經陳皮理胃氣爲俾佐服二劑
診之數脉退去一至又服四劑又退一至而昔
日之虛洪稍收歛有神矣外證四肢腫硬漸平

攻刺亦無心中不言昏悶又四劑前之硬滑俱
已空軟數亦更減然真陽未復邪火未盡退也
以六味丸料四兩作一劑頓服之腎經洪大脈
全斂而火退矣復因夜間取涼太過至下午覺
身寒唇昏紫黑此邪火退而陰陽俱虛急用人
參三錢白朮一錢甘草三分白茯苓二錢當歸二
錢附子一錢八分官桂二分服之一茶盞覺身
大熱口乾時索水飲發熱此真氣虛不相合和

降不下故也至初更診之六脈俱細急短數略
無和氣予甚危之至明日再診則有神氣尚有
六至餘此陰陽未全克復元氣未充耳教以朝
服六味一錢五分 日服補中湯數十劑而
愈

劉某夫人年及三十稟體元弱未病十日前身如
舟中行後忽遍身痛臍下痛牙關緊不言目瞪
汗出大小便不通身熱延予視之診其脈俱浮

細來往不定一息十餘至重按則無退而思之
外證皆屬陽虛脈又無神臍下痛甚目瞪至死
而醒陽和之氣欲絕而胃氣虛升降失司故大
小便不通且東垣云裏虛則急以此思之則內
外俱虛宜先建中將四君去茯苓加歸芪各二
錢熟附二分午時服一貼遍身痛稍緩而小便
溺矣申時又進前劑汗止遍身痛已大便亦通
但臍下痛不減及兩脇痛此陽虛也寒甚也又

加附子五分臍痛止矣但大便秘了而不了有欲
出而不出之狀正東垣所謂血虛加當歸身一
貼而愈

李子才年四十餘素性暴忽因怒卒暈倒脈浮中
無沉按數六至此陽虛陷入陰中之證以補中
益氣加六味丸料少許四貼而愈

一少年忽不思食惡心偶逢文期強作文一日晚
卽頭暈作嘔余脈之二寸洪緩以爲勞碌而動

心火遂以加味道遙散二劑嘔不食病亦不減
其年正二三四月淫雨此淫勝而然也太無
神木散一劑卽不嘔惡第頭暈未除二寸脈猶
如故其脈狀有焔焔欲發之意用前劑加紫蘇
防風取微汗頭暈除脈亦退第不思食耳六君
子一劑飲食如常

周近菴令愛年十九左耳下紅腫發熱作痛脈之
六部俱數八至無神且素弱經水不調子曰此

運氣病也以小柴胡合四物加牛蒡子內黃芩
用酒炒四劑而愈

近菴令子室年二十餘兩耳下俱紅腫痛甚發熱
其狀可畏醫者以大黃行數次又用敷藥反覺
坐臥不安亦運氣病也診之六脈俱細數少力
惡心不食先以人參敗毒散一劑以發之又用
甘桔加牛蒡射干陳皮半夏含漱之次將小柴
胡湯內加牛蒡六劑而腫消飲食猶未貪異功

散加牛蒡四五劑脾胃健而全愈

馬山徐雲所六月受熱受勞又飲酒忽上膈不寬
如刺痛頭暈且重自以過食曾以指探吐卽枕
不得惟坐而已予診之二寸俱洪緩有力關尺
俱弱帶弦此溼熱上干清陽之分故頭暈重胸
膈痛此時症耳用平胃加半夏黃芩紫蘇木香
取微汗此症卽退就枕平復

淮安客年三旬外季夏患癰瘡單熱不寒連日發

于午後熱躁譫語至次日天明纔退數日後忽
腹痛晝夜無間勺水不進呼號欲絕遇瘧發時
卽厥去延醫治之投藥皆不效求余診脉弦細
而濡余謂弦細爲虛爲暑而濡爲濕蓋暑邪爲
瘧濕熱乘虛內陷而腹痛用酒炒白芍炙草五
分水煎調下天水散五錢服後腹痛如失次日
瘧亦不發

痢例

甲辰閏九月間天氣寒熱不時痢者甚衆予四弟
永穆年二十七歲忽患痢下紅腹痛後重已三
日矣來取藥付以芍藥湯一貼香連丸二服不
止反增心口如刀剗當臍腹痛肛門痛亦劇聲
撼四鄰自分必死告母決別因整囊往鄉視之
晝夜不得臥次數難定日下紅血一桶痛不可
忍發熱流汗不食脈之六部皆豁大浮中沉無
力四至予曰雖痛雖發熱脈無力已虛寒矣古

人云脫血益氣此證正宜遂用異功散加升麻
三分木香五分炒乾薑五分一劑去後覺踈痛
亦可忍至五更腹痛如前予曰此藥力盡也急
煎一劑與之比前愈踈痛亦減七八卽酣睡至
日中方醒云不甚好過予又曰此藥只能支持
一覺再煎與之遂安寢至晚痛止後重亦可還
服前劑而愈一二日後因喫雞肉仍前腹痛肛
腫穢下不止又三日病勢篤極復報予診之脈

三至餘浮無沉按之則大脾命脈微與補中益氣湯不應此虛脫之甚加御米殼一錢亦不應下如洞泄流汗發躁尺脈漸欲收歛予亦慌急令人二更後往城取參至早歸補中益氣加人參二錢服之下咽覺憤此正氣欲復邪氣欲退也頃之精神頓增痢稍緩恐再作又一劑下注昏憤發熱躁諸症漸緩脈亦有神短脈退尋思久之古人云久泄久痢湯劑不如丸散卽合參

性理五言
卷之三
苓白朮散與服覺踈下至下午復躁熱予再脈
之左尺洪如火射狀此陰虛火動之象與加減
八味丸至六十丸精神覺爽頃之又下八九十
丸睡至天明病去十七方信立齋師加減八味
丸治水涸之症卽令朝暮服此丸復合參苓白
朮散漸愈覺小便痛想動色事故耳服以逍遙
散門冬五味子而平

王春元二令郎年甫七歲久患赤痢消導削積之

劑已服過多後轉下白如涕渾無糞診之浮中
沉六脈俱虛無神三五不調外症手足俱冷且
硬面浮齒白懶語此陽氣虛寒之症宜溫補脾
胃以生肺金用補中益氣加炮薑官桂各二分
其間人參止用三分且陳腐不堪服四劑手足
略軟言語亦健第未溫耳其下白仍不減亦虛
寒滑脫危症宜補宜澁宜溫復用前藥加好參
五分大附二分半御米殼一分服一劑則足已

溫大便卽有糞白退十八自茲手足俱溫軟泄
自全止還服前方去御米殼附子二味予歸囑
以如身中已溫暖薑桂亦去後服參苓白朮散
以培中氣使來歲乙巳厥陰風木之氣不能制
飲食尤宜慎之

予友薛理還僕遠行忍飢又相毆脫力時五月初
遂發熱詰語以補中益氣及五苓數劑不效延
予診之六脈俱無乍有則甚細其外症則面赤

譫語口碎一友曰陽症見陰脈證在死例子曰
當以陽虛從脈捨症治之遂下附子理中湯冷
服二貼脈稍見四貼則脈有神而口碎愈矣六
貼則脈如常但譫語未已子曰脈氣已完復而
譫語不休者胃有燥糞宜以胆導導之果下燥
結譫語遂平

馬見源精神素弱且勞甚餓時喫冷肉一塊遂不
快發熱譫語作狂乃飲食勞倦之症鄉醫先汗

一次不退又下三四次便倦怠昏沉不思飲食吐痰晝夜不寢下多亡陰中氣大虛之故迎子診六脈俱有四至洪緩無力

至半夜反加吐痰不已起復診之六脈俱細此邪氣已去真陰欲還陽虛反發躁之象急用六君加薑桂各三分服卽成寢至明午方喚醒之又一劑欲睡不醒精神反覺懶怠邪氣盡退而正氣將復矣至下午喫未湯一鈍口知穀味再

用補中加乾薑桂門冬五味而瘳

脾胃例

孝廉王于鑿父年六十餘六脈俱弦牢右三關浮

中沉甚豁大左三略差外症晚則作飽且大便

不利此土受木制脾胃不輸津液中氣虧損之

候也宜補脾胃生肺金乃用補中益氣湯加官

桂以削木之尅制炮乾薑以溫脾胃徹沉寒山

藥山萸佐當歸以養陰麥冬五味驟收肺金以

生新水服二劑覺胸中稍寬身中反有眩意此
正氣欲復而邪漸退故瞑眩耳又服數劑復診
之則牢堅已去第二尺俱洪此真陰真陽並虛
當平補之用八珍晚服六味丸大腸漸潤再數
劑全愈

邱生年十八歲正月間過食麴餅湯麪遂不快發
熱頭痛邀予診之脈略緊中沉洪滑曰當先除
去風寒以九味羌活湯一貼寒熱頭痛悉失但

覺不快耳予適他去彼延別醫用柴平湯一貼
病不減晚歸診之脈洪汗出而腹痛甚不可按
以元明粉泡湯下導滯丸二錢其痛減半尚有
脹再用前丸一劑而飽脹如脫但腹痛耳復增
瘧狀予又診之六脈俱細弦此脾土受木乘又
被伐之過宜用溫補以理中湯二劑肚痛除又
以過食復飽診之弦細如前仍以前湯但溫脾
胃而食自消諸症去

湯如玉母懷七月而生後每大便甚艱須二三時
方安百治不效予謂肺腸氣血不能吹送欲來
不來乃脾虛也脾主信欲來不來無信也當補
脾肺使各施其令而吹噓之氣自如調理數月
而愈

一婦年五旬二寸浮洪二尺小右關弦不思食頭
眩余曰二寸浮洪病主頭眩亦主上膈不清此
陽氣虛而越上不能歸根復元以致丹田氣虛

寒不能養溫脾胃是以右關脈弦飲食不消而少飧也理宜歛陽氣歸于下焦丹田之內下焦溫暖脾胃自健水穀自化矣用桂枝白芍六分五味子二分白茯苓一錢黑薑三分人參五分杜仲一錢破故紙五分炙草四分湯泡半夏一錢加煨姜十餘劑而愈

蔣懷幼年六十素吐白沫已數十年矣忽喉中有噎意以白子曰此脾胃虛寒也宜用人參調補

中氣彼辭以貧窶自將曰糖薑汁熬化含吐及
六七日則溏泄日五六次神亦勞倦食亦不貪
延視之六脈皆二至來三五至則止如雀啄之
狀此元氣大虛不能噓吸周迴耳用六君子加
肉桂四分吳萸二分乾薑二分二劑則脈連續
而不止又二劑反加浮洪粗大數七八至發熱
口碎舌碎乃虛陽上越之證予思之脈已犯難
治之例且吐沫不止腎水泛脾虛失統也用

病亦稍退稍勞卽復服數劑復減再勞又如故
至兩三月後藥亦不受亦不效五六日而歿先
賢云粗大之脈難治書此以證之

虛勞例

曹桐江令堂年六十外九月間發熱少殮余診之
六脈俱無神有八至右關浮則滿沉則無正經
云脾虛浮似肺亦火內鬱之症脾弱宜矣用補
中益氣數劑變瘧此正氣復而邪氣欲出矣用

慎齋五書
卷之五
六君加

乾薑四貼痊復合參苓白朮丸調

理康健如故

三月間予六弟年九歲先于二月十八日病痧疹
退發熱不已不殮飯食惟飲冷水啜數口少頃
卽出延至三月來報余思之曰不思食脾胃虛
也欲飲水熱也飲少頃卽吐中虛假熱也且兼
吐酸水此木旺土衰之病以六君加薑炒山梔
服二劑熱住少頃復熱此中氣虛極得藥力則

退藥衰復熱此藥力少而病氣重也往診之脈
胃脈細弦無神五六至不定見遲左三洪漫看
指上三關俱透命關脈已黑喘氣晝夜不休徧
身發熱六日十日餘不更衣矣遂胆導一次出
糞不黑不硬而帶溏非真元之熱乃脾胃氣虛
不能升降耳小便赤澀欲便則叫呼痛楚之極
乃陽氣餒而下陷升降失司氣化失職所致用
補中合六味湯三貼加麥冬五味子喘氣卽止

熱亦退惟小便澀痛不已仍用補中益氣加麥
冬五味子牛膝車前乾姜炒黑清肺生水升陽
益胃暖中一劑小便出血并血塊若干乃邪火
煎熬陰血乾枯而成也又二劑痛止飲食頓增
全愈矣予曰用前劑而獲如此之效豈非補脾
養肺金盛水生氣化自出之謂乎了吾先師云無
非清氣下陷不升不降此翁諄諄言之治百病
無不驗識此以語後昆

曹梧岡令愛年十七歲七月間以勞倦發熱不思
飲食六脈俱洪用逍遙散四劑遂愈自後飲食
不甚貧肌肉不生此脾胃虛也還宜服補中之
劑彼視爲泛常不及調養延至十一月間忽氣
喘咳嗽此土不能生金也且發寒熱復診之六
脈無倫次無至數偶來一如游絲亦無定蹟外
症喘急吐痰不食面紅遍身冰冷兩目有時而
左紅赤有時而右紅赤此脾胃久虛真陰漸亡

虛陽上越之危證以六君加薑桂各三分門冬
五味黃芪二貼嗽爲稍緩四貼而寒熱止飲食
增又診之右三脈尚弦細用補中加姜桂晚煎
八味丸一錢五分十餘劑而痊至來年正月間
復病如前蓋因節下飲食過傷亦緣前之元氣
未復脾胃未充故耳其症比前更重脈亦如前
日夜不睡以歸脾湯加大附三片薑桂各二分
服一劑卽斂睡一晚又三劑更服補中加薑桂

山藥故紙二十餘劑復診之右三比前覺定但
弦不和仍服前湯用八味丸四十餘粒同煎服
之又二十餘劑身溫症退而平

錢心卓令愛五歲先于十二月間患肛門腫痛且
碎且瘡不思飲食以翰示予曰此脾胃虛弱虛
陽內鬱不伸下溜侵肺金受尅之故宜六君加
升柴吳萸製黃連炒黑色三分二劑卽瘳第未
全復延至正月盡發熱不思食眼劄淚出而紅

泄瀉服他醫煮肝治疳之藥不效復語予亦以
四味肥兒之品與之初覺有效數日反益重此
元氣已虛攻伐太過也遂乘舟來就診之則右
關弦細左關洪漫發熱日夜更甚晚間瀉十數
次咳嗽予嘗觀脾胃不足及久病之人未有不
左脈大過于右者正東垣左脈尅右脈之說理
勢使然况脾土一虛肺金益衰水涸木枯木
生火焉得左脈不大于右用前劑加薑桂門冬

五味送下四神丸六七貼暫進暫退脈細如故
此元氣未充不宜改方彼亦深信又服四劑眼
劄略踈矣此真元漸有復意適了吾師至云所
用之方止減陳皮泄氣不能堪也又去陳皮十
餘劑病減十八再數劑全愈

張敬山夫人年四十外病已八月多矣遍身肉盡
脫氣喘不思食延予視之六脈俱和緩有神四
至雖名有胃氣經曰形肉已脫者不治脈不應

病者死姑用六君加門冬五味乾薑二劑初覺不安頃之遂齁睡氣喘亦踈聲亦響亮復診之六脈俱細脾肺二脈似來似去欲脫之象此的爲死候矣再三諦詢彼云稍可但不思食耳予思此脈比前反退甚是不宜又勉進前劑一貼又瀉增胸膈飽悶且不納水湯此中氣已虛不能輸運遂查歷日乃乙巳日今晚死矣重於甲卒于乙此五行之定制也已而果然友人薛理

還云久病脈有神服藥頓退此決死之病正如
燈火之將滅反愈明而遽絕耳

王姓女六歲痘後患咳嗽將三月不思食迎予視
之六脈弦細此脾肺虛寒也六君加薑桂門冬
五味四劑飲食頓進嗽亦稍止此真元未散藥
力易得再十餘劑去十九然脈尚弦細較前不
過略和教以服前劑不允而止明年復患如左
脈亦仍前以前劑治之全愈第脈終未和緩猶

帶弦細也予曰病雖瘳脈氣未復又明年三月
重患如前又視之如故以十全大補湯門冬五
味四服而愈予思之猶未脫也當補中大補劑
百餘方獲五藏堅牢而宿疾亦不再起矣不然
年盛時色念一動將有不勝其喘患矣世醫以
欬嗽之疾全作痰火盡治以清痰降火順氣尅
伐之劑遂至脾土中損多致不救不知欬嗽之
疾繇脾胃不和肺金失養金不生水心肝二火

陡起于內乘所不勝遂咳嗽不止而肺病奄奄
脾胃益虛此子病母憂化氣使然也正宜補脾
胃生肺金不拘劑數使脾肺得養五行暗化土
盛金生而咳嗽自休矣

丹徒王盛之年三十餘六脈俱九至外症則咳嗽
面赤懶言怕鬧時病已年半從前苦寒之劑不
記數矣此真氣已虛而脈數也經云數則元氣
虛數則脾氣虛又云數則有熱而屬虛是皆不

足之症六脈中又脾腎二脈洪大此肺金不能
生腎水也理宜補肺金生腎水水旺則制火金
旺則生水平木木平則脾土盛又生金矣此正
治也乃與云茲證服藥十四五貼或念貼外當
有汗出此陽氣升而經絡通矣汗後卽當倦八
九日或半月此邪退而正虛也或十日半月元
氣漸復倦態方去自後溫補脾胃之劑又當痰
動血動或發種毒或作瀉此數者聽其自來乃

藏府邪氣欲出發動流行之象也倘不預言恐
變症多端患者驚駭耳因與以補脾生肺滋腎
水之劑五六貼數脈不減此真元虛而燥也卽
以前劑去頭煎服二煎三煎不十劑而數脈去
此時虛火一退中氣便寒以六君子加薑桂五
六貼脾氣運動痰飲便行歸于腰脇肝腎部分
大痛邪之所湊其氣必虛益見肝腎虛矣令外
以鹽熨內服二陳加桃仁元胡索薏苡仁二貼

大腸見痰血而痛止復用補脾六君加五味白芍而愈倘不預明此理則變出腰脇痛時便沒主張矣

一婦年五十小便時嘗有雪白寒水一塊塞其陰戶欲小便須以手摳溺否則難予曰此胃家寒溼緣脾氣虛寒凝結而下墜至陰戶口而不卽出者脾胃之氣尚未虛脫但陷下耳用六君加薑桂不念劑而愈

一婦素勞症四月間胸中作飽腹亦脹不飢日夜瀉十數次診之肝腎脈弦而不和此肝腎虛寒也治以破故紙一錢杜仲一錢五分山萸三分熟地三分吳茱萸三分甘草二分烏藥三分沉香磨三分四貼稍有轉頭八貼能進湯水念貼全愈

豐義儲中和持齋十七年矣先九月患夢泄已而發驚此五藏空虛津液燥涸肝木生風風火扇

搖故令精動而泄也攻補皆不效先潤養其脾
胃脾胃潤使津液四布百骸通澤一月再診之
肺脈大土不能生金也左尺細長金不能生水
也餘俱洪緩第不甚流利以補肺之劑四劑則
和而長矣虛則補其母之法也先時不知饑以
異功散黃芪桂芍五味子補脾生肺肺復生
腎三藏松生晚臥不寤以歸脾湯間服之元氣
漸充精神漸發越半月餘加用太素丸全愈

庚午正月診得用吾先生左三脈沉枯細小澁此
勞傷筋骨脈也右三脈浮而洪數左右皆八九
至此飲食勞倦傷脾脈也其症神思昏倦發熱
先因飲食不消曾服消導之劑以致如此思之
曰脈雖數年雖高症雖重而長緩尚可延生遂
用保元加桂芍五味子黑薑三分服數劑浮洪
脈斂數脈亦退第不知饑耳此脾胃不開也且
服此劑而無汗必氣未全旺遍身經絡尚未通

故耳恐此後必發毒因五藏之邪未透毒必內
攻一經而出况此平素鬱勞甚毒必從虛藏而
出未幾果少陽經發一毒痛甚其堅如鐵灸之
念艾遂浮腫而散傍復生一腫再灸念艾而痛
止耳前後板甚此血雖行而滯未盡散經絡未
盡通再以保元補脾活血通經之劑與之適左
半身發汗甚粘左屬陽此陽氣發動也明日覺
身中不安而躁此作汗之兆果下午遍身有汗

且作瀉此中氣虛寒也以中和散人參湯調服
遂稍饑肚痛亦退矣明日再診六脈俱六至二
尺弦此下焦虛寒丹田氣冷命門火虛不能生
脾土也虛則補其母不思食而作飽當以六君
子湯主之加破故紙小茴香溫下焦以生火火
以生土之義加黑薑以溫中以稍食加健運加
桂芍五味以斂肺金生水水升火降也自此以
後脾氣漸健飲食漸進而腫處滯血方化爲膿

大抵脾胃之疾兼之高年又值春木正旺之時
過此一關無肚飽之症可保萬全矣

頭痛例

一老婦患頭痛二月諸治罔效余治以通經絡和
氣血之劑十餘貼晚上吐血二碗許其家惶恐
奔告余謂其症明日當愈已而果然

一貴介年三旬先因齒痛用石膏三錢煎服頃卽

滿頭皆腫痛牙根上腭腫勢尤甚俟天明稍退

蓋得陽氣故也診之右關細澁左關洪左尺亦澁余謂須納氣下達方得脉和定方名羌活散火湯羌活酒炒五分防風三分酒連一分酒芩二分白茯苓一錢人參二錢甘草五分半夏一錢破故紙一錢枸杞子一錢二劑其細澁脉卽粗大是陽氣下行矣頭痛稍止可見前頭痛是下焦無陽陰火上衝服之八劑頭痛全止齒根腫猶未退脉則益和余曰將愈矣此陽氣已至

小
恙所果四五日
出膿少許而瘳

胃脘痛例

萬歷壬寅六月間家君年五十三矣患心口痛嘔
食面黃診之脉細弦數六至餘卽灸氣海乳根
各數壯服補中益氣湯加吳萸姜炒黃連山梔
二三十貼又以四君加減丸補脾遂愈明年天
旱家貧車戽力罷復吐酸如前再服前劑及八
味丸而安

一婦人年五十餘素有心疼久已踈矣七月間舊
病忽作醫以寬中導氣削堅攻血等劑致中氣
愈虛不思飲食神憊迎予治之已五六日不食
診之六脉俱沉惟脾胃弦細似有神尋亦難得
外證則心口痛左脇脹硬嘔苦酸水但能飲清
湯如喫米湯一口卽飽脹不勝正木來尅土之
症也然其人脉病雖篤面色肌肉猶不甚脫憶
古人憑證不憑脉之語投以異功散加吳萸乾

薑佐以薑炒山梔三分二貼病失十五再二貼而愈

眼痛例

徽州方奉安令郎十二歲孩時乳母無乳且喜酒恐其父知無乳私以果米食喂之乳哺三年後便眼弦紅爛此受母濕熱故也漸至眼不得開延予治之六脉俱洪予曰此腎水不足之疾當益水以滋肝木以六味湯加柴胡山梔數十貼

而愈時方秋候余復言宜多服前劑預培腎水
以助來春生發之氣彼怠緩不果至春遂如予
言他醫治以芩連涼心之劑進至五日眼不開
且發熱不思食作瀉咳嗽此過傷苦寒收降太
過致陽氣受虧胃氣不升發也復請視之六脈
俱八九至按至骨則細無神左心肝洪大于右
按之無力此氣血大虛元氣大憊之症幸童子
真元未散尚可救藥亦須服藥半年方可見效

治以四君加黃芪山藥門冬五味三月發熱咳嗽稍可作瀉猶未止教以服補脾參苓白朮丸間以前藥至半年脈退六七眼亦開矣第赤爛上下粘膩未除或時可或時粘此正氣未全復邪火未全退也還當扶元氣而邪火自息彼吝于參費復用別醫以補血當歸生地之類一兩月前症復作眼復赤爛不開反增惡寒發熱作瀉咳嗽如舊事已告急復求予診六脈俱細數

比前更甚余許以八貼之後惡寒不減便不可
回服保元加白朮門冬五味四劑後惡寒頓退
惟發熱不已余曰蓋惡寒者陽氣虛也服四劑
而祛之陽尚強尚可救療後以保元四君加山
藥門冬出入服之至冬眼弦赤爛已去數脈俱
退止五六至按之無力眼中不時兩眦有紅翳
入睛此陽虛上越之故也以補中湯去升麻入
熟附一二分七八劑翳退數脈亦退仍服前劑

而全愈

左光祿丞年及四十兩目俱瘀肉滿珠他醫與以祛風散熱之劑不效余謂脾主肌肉此脾胃肉滯也以桃仁泥二錢枳實一錢半連翹一錢半元明粉二分白芷二分山查肉一錢半晚上日服一貼至十貼而全愈余以此方治數百人患此者俱未嘗不效第先曾服多苦寒之劑已傷脾胃不思飲食者禁不可與如勉用之則眼必

壞且致虛損如患此症服過寒涼已傷中氣且
宜靜養守之亦得漸退不可造次致于失明蓋
此症醫者罕識陽明多血多氣之經而經云血
實宜決之此方決之之意也如患者脾胃素虛
必欲服之或間日一貼或間二日一貼可也急
服則損目傷脾矣

邱豫章患痧滿眼醫以大黃行之祛風散熱之
劑服之俱不退以前方三四劑而愈

一女人年五十餘素眼疾因服祛風散熱之劑忽
口乾且發熱多眵開合不得紅筋薄翳滿目六
脈洪數五六至浮沉俱無力此氣有餘而血不
足症也四物加黑柏二分山梔陳皮八貼而愈
劉夫人年五十餘忽眼疾醫以祛風散熱養血之
劑治之不效已五六日矣眼珠痛聲撼鄰予診
之左關洪喘且大此肝血不足肝自生風也細
觀之左瞳神散大痛不可忍無紅筋加味逍遙

一貼服之痛止一二時復作此藥力盡也日服
二劑將六七貼痛減十六十二三貼全愈後教
以服六味地黃以生肝木

楊宅使女年八歲兩目眇淚不乾

眼眶

赤爛此脾胃溼熱以胃苓加酒炒黃芩連翹六
七貼而愈

一朱友年三十外患左目自上而下紅瘀兼翳俗
曰垂簾其勢自上而下像垂簾之狀故云用加

味道遙去白朮加川芎少白芍十數貼去其十
六再十貼而全愈復令服地黃丸 一唐友年
二十外症亦如前亦用逍遙加減如上服十五
六貼而愈

齒痛例

家慈年五十三歲齒痛不食已幾月矣人悞以舊
方野蜂窠填入鹽椒羊脛骨爲末擦之滿口皆
碎倍痛愈不能食而母以人中白塗疳散抹之

方可進湯水遂乘舟入城診之右三脈俱伏左寸關細左尺洪緩怵曰揀方醫病不如以理思之右三部伏因齒痛不便食脾胃失養故也左寸關細者緣脾胃虛不能榮養心肝之血而然左尺洪緩乃溼熱耳用白朮甘草陳皮補脾胃四物湯以養陰血蒼朮茯苓黃柏知母以除尺之洪緩胃之溼熱四貼而愈

崔友年二十外素好色忽患齒痛遣使來云病齒

齒腫痛且流血不止予思之曰此木尅土之象
肝腎血虛風火妄動乘其所不勝也以加味道
遙散二劑治之服一劑則痛減血收二劑全愈
蓋涼肝腎之陰治風熱之標培脾土之虛經云
木鬱則達之火鬱則發之正此謂也

師祖存碧年四十餘素脾胃不充忽一日齒痛兩
口角流涎不止灰挹滿斗楚聲撼鄰脉之右關
弦急此脾胃虛寒之症用補中益氣湯加吳茱

莫乾薑肉桂各三分內人參五分服之頃間痛未解而反增坐臥不安此藥力未施也再頃之痛雖減而涎猶不止予曰涎乃脾家液不宜過去卽煎前湯加入人參八分明日又如上一劑痛止液亦不去再三貼全愈

雜症例

一女人胎八九月矣忽腰痛甚診之六脉俱細二尺澁且弦予疑之視其懷抱不虛予曰雖是胎

恐難產亦恐或墮後遇查育吾先生診亦如子
言以養血氣藥與服遂得如期而產一子然不
暮而一觀此女素稟弱勉得胎孕而乏其滋養
宜如此之尅驗也

姪男甫六歲三月間忽然熱三日左面心胃經部
分出痘一顆如鷺眼大右眼弦胞皮上一顆不
甚發而沒餘有細紅筋數條至五六日不貫漿
發熱煩躁晝夜不睡肚飽咬牙寒戰抽搐時刻

叫喊不安余視之六脈俱八九至幸大便不瀉
予思曰壯飽者脾胃弱不能輸運毒氣也煩躁
者腎水不足而有火也抽搐咬牙者水不能生
木枯木生火風火搖動之象乘其所不勝也大
法當先保元氣清肺金生腎水水旺木滋而火
自息遂合方名保七六三湯保元湯七分六味
湯料三分也加門冬五味一貼鼾睡半日醒而
復躁復半日徧身如蚊螯之狀甚細又照前一

貼復睡如前醒後煩不安予曰鼾睡得藥暫元
氣少復邪氣少退之故復煩者裏毒未盡出也
復用參芪四聖飲二貼漿足黃如蠟色又七八
日方脫靨古人云三日熱三日透三日齊三日
漿足三日脫靨此正氣不虛者言也虛而邪盛
者不拘于此余曾見咬牙寒戰俱棄之不醫而
諸書亦云難治惟立齋先生有治方不拘此神
化再出非庸醫可覩其一二者

葉少池令郎年十五發熱是不能行且痛予診之
六脈俱十至二尺弦細此血虛發熱兼濕有寒
用逍遙散加酒柏三分蒼朮一錢三分吳茱三
分二貼全愈予不意應效如此之捷

丁會成年四十餘春季右腿正面忽痛麻診之右
三部洪數五六至問口渴否曰是也升麻葛根
湯二貼而愈

壬寅九月間大妹年二十一歲緣家貧憂悶忽患

乳癰不信服藥漸至脹長尺許極爲可駭予思
石山先生微義大都人患瘡癰畏針不早開膿
致大傷陽氣後難收復卽以神效瓜萆散二劑
與服之膿卽射出厥後果然瘡口不收汗出如
珠至日西則昏憤不省人事予曰雖膿已出陽
氣終損第未全脫耳診之脾胃命門脈細弦餘
浮無沉按無力此陽氣虛也以十全大補及補
中益氣出入服之數十貼方愈仍令再服八味

丸數斤無後患不則陽氣終難恢復以怠惰不
如所言來年十月間前陽虛之症復作流汗如
珠拭去復有予曰此少服八味丸之故以補中
益氣加吳茱萸破故紙乾薑二三貼卽減數十
貼而安復教以服前丸妹猶未果又來年七月
患傷風狀來告予欲藥予曰此陽虛不衛外之
故以補中益氣二貼服之緣中氣寒極不甚應
病已十二三日矣復召予視之汗出流水面赤

舌出不收嘔惡吐痰吐酸晝夜不知人事下瀉
清水滿口皆碎膈中隔塞不通診其脈十至餘
有影無形浮中沉俱無力脈狀難定明知前症
之虛寒尋思東垣此事難知之旨上吐下瀉此
中氣不和脾胃虛寒之症也卽投理中湯加吳
萸薑汁炒山梔一貼上下皆通舌收喘定痰止
遂索湯水惟昏憤如故再一貼口瘡盡愈與十
全大補湯并服加減八味丸二十劑餘兩太陽

各生小癩一二枚前數脈盡退方識人自云而
晝夜如夢今日方醒九月盡再診之豁大難明
之脈已退惟細弦耳尚呃逆吐痰重以六君加
吳萸乾薑砂仁煨薑一二劑呃止復以異功散
加乾薑吳萸及前二丸而愈

邱子明年五十外左乳上發一腫服消毒藥且不
戒勞又兼遠行遂腫大如盤高一寸許猶服前
消毒劑反增惡寒不思食余視之六脈俱弦微

大不和無神此陽氣虛而脾胃亦虛寒之症以
棗大艾圓傍逐一灸至中以痛爲度積八十壯
服六君子湯加黃芪一錢薑桂各五分一劑至
晚卽睡不覺天明腫遂平嘔惡減半再劑嘔惡
去飲食頓增復用八珍湯去地黃加芪桂薑如
前腐如瓜瓢此陽氣尚可作腐可醫之兆予適
他往瘀死之肉剪遲瘡面運結色黑如墨重發
熱攻閉一方醫爲割之熱透遂涼仍服消毒藥

乃泄瀉日數十行嘔惡渴甚吐痛瘡紫黑子歸
急用六君加芪薑桂如前煎送四神丸百粒二
劑泄瀉止半三劑肚痛泄瀉俱定瘡色變紅但
渴不止此真陰虧也用八物去地黃加芪薑送
下加減八味丸七十餘粒數十劑而愈

一友年二十外左邊舉丸并腰痛醫以大黃等藥
與之約六七日矣反發熱痛甚此寒氣傳于內
著而不行也余診之二尺沉按弱細餘俱洪數

且有滑意予曰此作痛將欲成膿用真人活命
飲加人參五分及 牛蒡子一劑痛減二劑

全愈

蔣子賢年四十外因長途勞頓兼酒色面若薰黑
橘黃帶微黑也無力不思食六脈俱細盜汗惡
心作飽用六君加蒼朮一錢肉桂二分乾薑三
分六七劑口知味知饑至三十貼面紅活但作
瀉未止與以四神丸三四服而愈第覺左邊舉

丸有腫意此脾胃健運溼熱下流之故也不及
治之復北行酒色兩兼且受惱怒重發熱不安
與補中益氣加羌活蔓荊一貼熱稍退而陰子
腫大如鷺子大左脈洪用小柴胡湯合四物加
車前一貼不減且溺則小便澀痛難出口乾發
熱更加龍胆瀉肝湯加牛蒡子七八貼發熱退
去口乾亦減溺亦不澀畢丸腫軟十八又服數
劑服活命飲加牛蒡人參十數劑腫消

王岐岡年十七讀書坐久受寒遂左邊舉丸作痛
用真人活命飲加牛蒡人參八貼腫消

陸起潛右拘患腫作痛六脈洪數右關尤甚用道
遙散加川芎二貼而愈予曰洪心脈也數者火
旺水虧之徵也而右脈盛氣有餘而血不足也
肝血不足肝木生火故脈洪數也而右陰拘腫
痛者以右脈甚也拘者肝家部分肝木爲火所
爍則筋急而拘攣腫痛也以前湯清其熱養其

血培其根故捷如影響也

劉七官年十七徧身膿窠瘡其色紅紫余視之則
躄足而臥以隱曲處多瘡難于屈伸故耳六脈
俱洪大有力數有七至用加味道遙散四貼而
愈越二月手足復患如前六脈俱按洪大以四
物加朮陳芪門味八貼而愈

伍姓久患漏腫肛口連鬣尖流血不止醫以大黃
末敷之其肉漸黑硬麻且病目紅筋滿珠開合

不便余視之以逍遙散加味者添桃仁連翹十
餘劑服之而紅筋十退六七而漏亦稍可予復
令揭去大黃日灸艾十餘壯候痛卽撤之內服
托裏消毒散加破故紙以其命門脈弦故也服
數十劑惟此方去取一二味後肉漸軟紅活而
愈亦教以服六味地黃丸加故紙杜仲

慎柔五書卷之五終

程瘦樵每以舊醫書餉予前歲得睹王太僕元和
紀用經及白飛霞韓氏醫通既抄錄而珍襲之矣
今夏復以慎柔五書示予予觀其書凡治諸症皆
以保護脾胃爲主淵原本于東垣而化裁宗諸薛
氏其于虛勞之症截然兩分治法不混更發前人
所未發詢爲醫家可寶之書也手爲抄錄不憚煩
暑亦以見老年嗜好云爾

乾隆丙午秋七月後學王陳梁識

時年六十有五